

Kerweredd 2019

Wann isch am ersde Sunndaach im August do howwe
steh,

un donn die goanze Mensche do unne seh,
donn waas isch, un do driwwer bin isch froh,
es schendsde Fest vum Joahr is do.

Die Rämschter Kerb is voll am laafe,
mer kann Brodworschd, Bier und Audoscooderchips
uffem Kerweplatz kaafe,
die Leid dun danze, dringe un erzehle sich Geschischde,
un isch du jetzd mid moiner Kerbredd aussem
Ordgeschehe berischde.

Es gonze Joahr iwwer heb isch rescherschied,
wem is wos fern Bolze bassierd und hebs donn in de
Kerbredd noi nodierd.

Drum horschd gut zu un gebd foi achd,
isch erzähl eisch jetzd, wer hod wos fern Misd gemocht.

Fischer Fischer...

De Willi aus Beerwisch dud seid em Johr jetzd do
driwwe regiern,
gut veel mee orrer wenischer als vorher dud aach ned
bassiern.

Die Verwaltung schaffd weider im gewohnde Trott,
un der is wie ihr eisch denge kennd mid Sischerheid
ned flott.

Die polidische Fraktione dun lieber rumlamendiern,
als lieber im Sinne des Bürgers emol zu agiern.

Doch egal wos bassied, oans is Gewiss,
dass in jedem Daal vum Ord baal eh Baustell is,
un zwische drin un des is ziemlich dumm,
mache aach noch die Kanalabeider rum.

En Mann aus de Bergstrooß woar des zu doll,
de gonze Daach woars vor soiner Hausdeer mid Audos
voll,
un weil er woar als Bojemoosderkandidat aach
ogedrede,

hod er sich hald gedengt er kennd emol schnell die
Straßenverkehrsbehörde verdreede.

Un so hod er mol schnell die Baustelle in de Roistraße
insbiziert,

die Baustell fer ferdisch befunde, un die Vollsperrung
selbstverständlich beended, goonz unschenierd.

In de Bergstrooß woor de Verkehr donn ersdemol ford,
weil er wirrer gerolld is dorsch die Roistrooß in die Mitt
vum Ord.

Falko, sei mol e bissje endspannder wenn e poar Audos
mehr rolle vorbei an deinem Heim,

weil du schaffst glaab isch aach bei em Audobauer in
Rüsselsheim

Die negsd Geschischd handeld vun zwaa Kerle,

un isch wedd mid eisch, ihr dud se all kenne.

De oo dud de goonze Daach mid Eintrachd Klamodde
durschs Ördsche renne,

un de onner is fast genauso klein,

uni s de Präsident vum Rämschder Kerweverein.

De Präsident, un do heb isch en ned drum gebede,
is glei in zwaa Gescheischde hinnernanner verdrede.

Bei de ersde Geschischi iss er nur de Adjudand,
weil er wolld mim Eintrachdfan zurück ins Heimadland.
Frie moijens vun de Kerb sin se hoom gedackeld
Un dursch de Alkoholkonsum hewwe se aach e bissje
gewaggeld.

Uff oomol segd de Steffen:“ Misch driffd glei de Blitz,
moi Handy is nemmehr in moinem Besitz.
Beim haamlaafe, un isch heds geschworn,
heb isch bestimmd des Handy verlorn.
Des deirre Ding, wie konnd isch des verliern,
wie soll isch jetzd mid de Weld komunizern?“

Un so mache sisch die zwaa ned long rum,
un kehrn uffem Absatz zum Suche um.

De Haamweeg dun se rischdisch absuche,
un als debai e bissje fluche.

De HC wähld als em Steffen soi Nummer oh,
vielleischd hern mehr ja irgendwo klinge, dodriwwer
wern mer froh.

Un so sin se zwaa Stunn loong dorsch de halwe Ord
gedackeld,
doch em Steffen soi Handy hod nirgends gerappeld.

Als em HC so in Aggu woar doon leergescheld,
hewwe se die Suche doon fluchend oigestell.

„So en Misd, jetzd muss isch mer e nei Handy kaafe, um
zu spoarn braach ich mer nix me zu dringe uff de Kerb
zu kaafe!“

Schleschd gelaund isser donn in soi Wohnung eigeriggt,
un hod wejem Handy aach mol e Tränsche verdriggt.

Er dud soi Jagg vor Zorn in die Egg noihaue,
uff omol dengdt er er dud soine Aache ned draue.
Es Handy leid, un des is ziehmlich dumm,

mid verzisch Anrufe in Abwesenheit uffem
Wohnzimmerdisch rum.

De Dabbes hods Handy ned verlorn, do driwwer is er
froh,
sondern oofach ned midgenumme, is hald mol so.

Un es Fazid jetzd vun der Geschichd:

Ersd mol iwwerleje wos Handy is, ewwer zwaa Stunn
laafe dorsch de Ord schaded eurem Körpern nischd.

Jetzd kimmd aach glei de negsde Gag,
de HC ging alleine weg,
Samsdachs wenn die Woistubb hod zu, un ihr kennd es
mid Sischerheid erahne,
gehds in die Stadt zu soinem Lieblings Kadalanen.

Beim Sergio un des dud de HC subber finde,
gibt's nämlisch Bacardi im nullfünfer Gebinde.

Do hoggd der donn die halb Noochd, dud schwätze un
dringe,

dud Sepia fresse un schee nooch Knoblauch stinge,
un moijens um sechs, do will er donn hoom,
es werd naderlich mim Taxi gefoahrn.

Er gehd aus de Deer, siehd a Taxi am Schloss,
iwwerlegd ned long un rennd glei los.

Doch renne is ned so soi Ding,
iwwerhabd wenn Alkohol is innem drin.

Er kimmd kortz ins strauchle, un des is ned foi,
un schlegd direkdt mim Kobb in ne
Woinachdsmaargdhidd oi.

Doch an der pralld er ab, soi kompactdheid dudem nix
nütze,
un er loond vor de Hidd in ner rießen Pfütze.

So ihr Leid, ich mach koon Jux,
de HC leid in de Pitsch un gid vun sisch koon Mux.

Fünf Minude späder gehen soi Lambe wirrer oh,
er dengd“ Gud isch leb noch, do driwwer bin isch froh.
Ewwer bidde was is mid mir geschehe?

Isch bin saschnass und vor lauder Blut im Gesischd,
konn isch ned rischdisch sehe.

Wie isch ausseh un misch föhl, des is joa de Graus,
es gid nur oans, isch muss soford nachhaus!“

Er versuchd donn verschiedene Leid mim Handy zu
kontakdiern,
es gehd hold kooner dro, des kann mojens frieh schun
emol bassiern.

Do woard er hald uff e Taxi ewwer des is koon Spaß,
weil wonn die de HC hald sehe, gewwe die Gas.

Er blud, is nass un dreggisch, es Erscheinungsbild is ned
groot galand,
er siehd eher aus als wer er von de Strooßeboohn
gerammd.

Doch nooch ner Halwestunn, ihr werds erahne,
dud sich en Taxifahrer dann erbarme.

Un bringd de HC Gott sei Dank,
zurück ins gelobte Rämischerland.

Als die Anke ihn siehd, segd se: „ Was hast du gemachd,
zu verregge?“

Un dud erstmol soi Vitalfuktione un uff Knochebrisch
tschegge.

Donn machd sern sauwer un verbabbd soi Gesischd,
un schaffd en ins Bedd ewwer ohne Gudenachd-
Geschischd.

Nooch e poar Daach sin dann die Wunden verheild,
un de HC naderlich wirrer zum Tscha-Tscha-Tscha eilt.

Lieber Hc dir geb isch jetzd mid,
schalde emol en Gang zurick,
du disch emol uff doi Alder besinne,
weil scheinbar dud die Kopf-Bein-Koordination schun
ned mehr gonz stimmt.

De Adjudand vun de negsde zwaa Geschischde dud ihr
aach all kenne,

in Ramschd dud mern nur de Eggeraacher nenne.

Der schafft beim TÜV, is in de Feuerwehr aktiv,

un a in Traaase bei der TGT Abteilung Technik is er aach
representativ.

Es ersde Malör is bassierd, un des kann mer ruhig so
verbreide,
uffem neierworbene Grundstück bei Baumfällarbeiten.

Do hods ausgeseje wie im Urwald, ihr wird jetzt lache,
un wenn mer bei de Feuerwehr is, fälld mer die Beem
selber, is hald ehrensache.

Die bassende Ausrüstung dud mer aach glei käuflich
generiern, Sisicherheit steht ja im Vordergrund un es
soll nix bassiern.

Un so lässt mer immer Samsdachs die Kettesäge
brumme,

mer will ja schließlich vorwerds kumme.

Baumansprache, Fällschnidd, werd alles gemachd,
mer hoods ja schließlich emol gelerd, des wer ja
gelachd.

Doch wann mer an Sischerheid gewinnd, un des is ned
foi,

schleischd sisch hald aachmol de Bruder Leichtsin oi.

Mer dud vorm fälle ned me so gena kontrolliern,

un so kann hald emol aach en Fehler bassiern.

Un so duds donn aach eines Samsdachs geschehn,

des gude iss, mehr dud de Fehler glei sehn.

De Fällkeil woar gesetzd, Baum fälld un jetzd werds
dumm,

es eigene Audo steht nämlich in de Fallrischdung rum.

Un da gids koa zurigg me un des is ned foi,

die Baumspitz schlägt krachend uff soim Lupo oi.

„ Ach du scheiße, woos is jetzd bassierd,

heb isch die Fallrischdung falsch rescherschierd?

Adam schnell hie un de Baam vum Audo runner,

Wann isch den Oobligg seh, heb isch großen kummer.“

Unso werd doon de Lupo vum Baam befreid,

un wasser doon siehd bereided ihm große Freid.

Außer e paar Kratzer am Auto koon mehr nix erkenne,
Sau gligg gehed, dess koon mer ruhig so nenne.

Un bei de restliche Beem gidd er doon besser achd,
un die Autos wern sischerhaldshalwer vum Grundstigg
gebrachd.

Bei soim negsde Bolze is die Feuerwehr mid im Renne,
die Alarmierungswege du isch eisch mol schnell nenne:
Woon die Sirene brummd orrer de Piepsa alarmierd,
wird schnurstraggs Rischdung Feuerwehrhaas
maschierd.

Die Sirene sinn ja uff de Dämscher mondierd,
un de Pibser wird vun jedem Feuerwehrmann
persönlich am Gerddel mitgefierd.

Doch de Matscho un des is dumm,

drägt de Piebser ned am Gerddel, sondern in de Hosedasch rum.

Un aus diesem Grund, is es bassierd,
de Piebser is de Hosedasch is mid de dreggisch Hos in die Wäschmaschien marschierd.

Uffgefalle is des naderlich koom, ned ums verregge, ersd owwends als mer wold de Piebser ins Laadegeräd stegge.

„Luca, Svenja hebd ihr moin Piebser gesehn?
Der is ned mehr do, isch koonn des ned verstehe?“

Doch uff oomol dud e Vorahung kumme,
denn aus de Weschmaschin wern so komische Schläge vernumme.

Sie renne glei hie un gugge dorsch die Glaasscheib noi,
un seje de Piebser drin drehe, des is ned foi.

Sie mache die Weschmaschee aus un dunn de Piebser rausfische,

der is hold kabudd, ewwer wenigstens dud er nooch
Lenor gud riesche.

Lieber Matscho, eins is klar,
du worst noch nie in de Kerweredd un jetzd glei
zwaamol, des is wunderbar.

Mach weider so, mer siehd du hosd Potenzial,
woosfer Bolze du reist is mer eigendlich egal.

Isch bin jetzd fasd ferdisch mid moine Geschichde,
ewwer oans muss isch unbedingt noch berischde:
In de Schlossgaadestrooß woar de Deiwel los,
weil es Bärsche woar de Fiehrerschoi los.

En Damenausflug, nooch Köln am Roi had mer vor,
das es Bärsche fährt is naderlich kloor.

Mer dud die A3 Rischdung Köln nuff brumme,
das an de Audobahn vielleischd a Blitzer stehn,
hod mer scheinbar noch ned werglich vernumme.

Un weil vum Bärsche de Gasfuß schwer is, fährt se
aach ziemlich schnell,
uff oomol duds vorne koorz blitze un zwar ziemlich
hell.

„Oh Gott, gids e Gewidder, woos blitzd doonn do uff?“
Noo du bisd geblitzd woorn, du hoosd ja aach nur doin
Fuß uffem Gasbeddal druff!!!

De Schregg woor groß un deshalb wird angemesse
weidergefaahre,
mer wold sisch aach weidere Fodos schließlich
ersparn.

E poor Woche speder is doonn die Strafe gekumme,
fasd 300 Oiro Knolle un em Bärsche wird 4 Woche de
Fiehrerschoi abgenumme.

De Schock iwwer die Strafe woor tränenreich un die
Uffrechung woor groß,
es wurd die schwarz Fohn gehissd in de
Schlossgaadestraß.

Viel Woche koo Audo foohrn, des hods schun
Jahrzende ned gegebe,

hoffendlich dud des es Bäsche überlebe.

Ewwer das es kaa Entzugerscheinunge gibd, orrer es
Bäsche gar en kalde Entzug midmachd,

hod sisch die Familie etwas ausgedachd.

Sie dunn ihr schnell a fern gesteierdes Audo kaafe,

do koon se in de Wohnung midrumfoahrn, muss ewwer
debei laafe.

Bäsche isch hoff de Lerneffekt woar en große,

beim negsde Ausflug e bissje uff die

Geschwindigkeidsbeschränkung achde,

un ned wirrer so iwwer die Audobohn bloße.

So ihr Leid, des woors gewese,

die Kerweredd is vorgelese.

Isch kennd noch als weider vun do howwe berischde,

denn es gibd noch die oo orrer onnere Geschischde.

Die isch verschond heb, um se ned zu blamiern,
könne sisch gern mid en Bier bei mir un moine Borsche
revanchieren.

Doch die Kerb is ja noch ned vorbei,
heid Owend haache die Silverballs uff de Biehn in die
Taste noi.

Un moje frieh um elf, des derf oahm ned dorsch die
Labbe gehen,
dud mer sisch uffem Kerbplatz zum Friehschobbe sehn.

De Fischer Peerer dud donn ordentlich musizieren,
un mer kann des oane orrer onnere Biersche in soi
Kehle noi blazieren.

Und moje Owend zum Abschluss vun de Kerb un des is
uns e Freid,
speeld uff de Biehn do owwe Watertight.

Machts gud ihr Leid, bleibd gesund, gligglich un froh,
denn due Rämschter Kerb is do.

Borsche:

Glöckner: Alex T-Rex Rapp

André Alpaka Beck

Bennie _____ Wagner

Weinschenk: Daniel Long Dong Fischer

Florian gloone Metzger Göbel

Hendrik _____ Frowein

Lars Starke von der Bäckerei Starke

Oliver die Fontäne Frank

Pascal Insta-Hasi Ehmke

Philipp Träcker-Flipp Braun

Timbo Bierkules Schnitzenbaumer